

# MAKIBAKA PARA SA PAMBANSA DEMOKRATIKONG REBOLUSYON

**H**indi na kayang maitago pa ng papet na rehimeng US-Arroyo ang kabulukan ng kanilang sistema! Ang nabigong pag-aklas ng mga *junior officer* at higit na 200 sundalo mula sa iba't-ibang yunit ng *Armed Forces of the Philippines* (AFP) ay manipestasyon lamang ng kanilang disgusto sa labis na katiwalian ng rehimen.



Talamak na ang korupsiyon at kawalan ng integridad ng buong rehimen, hindi lamang ng AFP. Ang patakarang “todo digmang kontra-terorismo” ng rehimeng US-Arroyo ay ibayong nagpatindi ng pang-aapi at panunupil sa ordinaryong mamamayan, lalo na sa mga hayag na demokratikong kilusan. Sa higit na pagbulusok ng ekonomiya dahil sa mga iskemang globalisasyon ng amo nitong imperyalismong US, wala ni

katiting na kakayahan ang naghaharing-uri na tugunan ang pinakabatayang pangangailangan ng mamamayan.

Bigung-bigo ang imperyalismong US at ang reaksiyong estado na tugunan ang malubhang krisis pang-ekonomiya at pampulitikang dulot ng malakolonyal at malapyudal na sistemang panlipunan. Nagresulta ito sa ibayong pagkahiwalay ng rehimen at pag-igting ng mga

bangayan sa hanay ng mga reaksiyunaryo. Kaya hindi nakapagtataakang nagkaroon ng pag-aaklas ang mga sundalo, lalo na ang mga mababang opisyal at karaniwang kawal ng AFP.

Ngunit, ang hinahanap nilang pagbabago sa lipunan ay hindi mangyayari sa pagpapalit lang ng mga personahe ng pamahalaan at ng mga institusyon nito. Ito ang malinaw na aral mula sa EDSA I at EDSA II. Bagamat mga hakbang

pasulong ang pagpapataks sa diktaduryang US-Marcos at rehimeng US-Estrada, hindinhindi ito magtutulak ng makabuluhang pagbabago ng lipunan habang hindi lubos na nababaklas ang sistemang malakolonyal-malapyudal na sinusuhayan ng imperyalismong US.

Ang pagpapabagsak lamang ng kasalukuyang estado at ang pagtatayo ng panibagong sistemang panlipunan ang tanging makakapawi sa mga batayang suliraning imperyalismo, pyudalismo at burukrata kapitalismo. Walang ibang magluluwal ng bagong sistema kundi ang pambansa demokratikong rebolusyong may sosyalistang perspektiba; isang digmang bayang isinusulong ng Partido Komunista ng Pilipinas (PKP), Bagong Hukbong Bayan (BHB) at ng Pambansang Demokratikong Prente (PDP).


Mula nang naipag-tagumpay natin ang Ikalawang Dakilang Kilusang Pagwawasto (IDKP), higit pang su-mulong ang armadong pakikibaka sa kanayunan. Dumadagundong ang kabundukan sa sunud-sunod na matatagumpay na taktikal na opensibang inilunsad ng BHB sa iba't-ibang bahagi ng bansa. Nakalatag ang kilusan sa 128 na larangang gerilya, kung saan nakatayo ang mga komiteng rebolusyonaryo sa baryo at mga ganap na samahang masa na nagtataguyod ng rebolusyon.

Sa pagsulong ng rebolusyonaryong kilusan,

aktibong lumalahok ang kababaihan. Dahil bahagi sila ng mamamayang inaaapi, dapat lamang na isanib nila ang kanilang lakas at talino sa rebolusyong magpapalaya sa kanila mula sa pang-aapi at pagsasamantala. Sa pagtatagumpay ng pambansa demokratikong rebolusyon, higit na nagiging paborable ang kalagayan para maisulong ang lubos nilang paglaya mula sa pang-aapi bilang babae. Bagaman hindi ganap na matatamo ang paglaya ng kababaihan, isang mapagpasyang hakbang sa kanilang pagpapalaya ang tagumpay ng pambansa demokratikong rebolusyon. Susi rin ang paglaya ng kababaihan sa paglaya ng buong sambayanan. Hindi magtatagumpay ang rebolusyon kung hindi kikilos ang kalahati ng populasyon. Ika nga, "Tangan ng kababaihan ang kalahati ng kalangitan."

Habang isinu-sulong sa mas mataas na antas ang armadong pakikibaka, dapat higit pang pagsikapan ng MAKIBAKA na pukawin, organisahin at pakilusin ang pinakamaraming bilang ng

kababaihan sa balangkas ng pambansa demokratikong rebolusyon. Bilang pangunahing pangkalahatang organisasyon ng rebolusyonaryong kilusan ng kababaihan, sinasalamain ng MAKIBAKA ang nagkakaisang hanay ng kababaihan. Malaki ang magagawa nito para imulat sila sa landas ng rebolusyon.

Sa gitna ng kasalukuyang krisis at polarisasyon ng lipunan, higit pang susulong ang MAKIBAKA at matatag na haharapin ang mga hamon ng pakikibaka. Mas mapangahas itong magpapalawak at magpapalalim sa hanay ng kababaihan. Patitingkarin pa ang panawagan nito sa malawakang partisipasyon ng kababaihan sa armadong pakikibaka. Mas pahihigpitin pa ng MAKIBAKA ang pagtangan sa paninindigang isulong ang rebolusyon at itayo ang isang lipunang sosyalistang magtitiyak sa ganap na paglaya ng kababaihan sa pang-aapi at pag-sasamantala. 

**Ibagsak ang rehimeng US-ARROYO!**

**Isulong ang pambansa demokratikong rebolusyon hanggang sa ganap na tagumpay!**

**Mabuhay ang**

 **MAKIBAKA**

# ANG BALANGAY NG MAKIBAKA SA BRGY. ALITAPTAP

Nabuo ang unang balangay ng MAKIBAKA sa kalunsuran simula ng Ikalawang Dakilang Kilusang Pagwawasto. Labinlimang miyembro ng MAKIBAKA ang nagtipunton noong Hunyo 15, 2003 sa Brgy. Alitaptap para sa unang asembleya ng balangay.

Ang Bgy. Alitaptap ay isang maralitang komunidad sa pusod ng Kamaynilaan. Kagaya ng iba pang mga maralitang komunidad, karamihan sa mga nakatira dito ay galing sa probinsya. Lumikas sila sa Maynila dahil sa militarisasyon at kahirapan. Kababaihan ang unang naorganisa sa Brgy. Alitaptap.

Dalawang taon silang gumampan bilang bahagi ng komiteng tulong-ugnay sa rebolusyonaryong kilusan. Ngunit habang lumalawak at lumalalim ang pag-unawa nila sa rebolusyon, nakita nila ang potensyal ng kanilang barangay na maorganisa. Nitong Mayo, naging masinsin ang pag-oorganisa sa Brgy. Alitaptap. Bahagi ito ng sistematikong pag-aayos sa lahatang panig na pagsulong ng gawain sa rebolusyonaryong kilusan. Nabuo ang Grupong Pang-organisa (GP) ng kababaihan at nakapaglunsad ng oryen-tasyon sa gawain. Sa

kalaunan, napagkaisahan nila na buuin ang isang balangay ng MAKIBAKA sa komunidad. Naglunsad sila ng mga pag-aaral, kabilang na ang Kasalukuyang Kalagayan ng Rebolusyonaryong Kilusan. Ang pag-aaral ay nakapagpataas ng kanilang moral at determinasyon na magbuo ng balangay ng MAKIBAKA bilang




kontribusyon sa lahatang panig na pagsulong ng rebolusyon. Tinalakay ang oryentasyon ng MAKIBAKA at nagbuo ng mga komite.

Hunyo 15, ginanap ang kumperensya sa pagbubuo ng balangay ng MAKIBAKA. Pinanood nila ang Resurgence at nagkaroon ng talakayan hinggil dito. Madamdamin ang naging talakayan ng mga kasapi, lalo na't karamihan sa kanila ay may mga karanasan din sa kanayunan at may mga kamag-anak na nagbuwis ng

buhay sa paglilingkod sa rebolusyon. Malaki ang kanilang pagpapasalamat sa Ikalawang Dakilang Kilusang Pagwawasto at sa mga tagumpay nito. Tampok na bahagi ng programa ang panunumpa ng labinlimang kababaihan bilang mga kasapi ng MAKIBAKA. Dumalo rin sa kumperensya ang ilang panauhin mula sa iba't-ibang yunits ng Rebolusyonaryong Kababaihan na nagbabalak na magtayo ng MAKIBAKA.

Bilang mga kasapi ng MAKIBAKA, tungkulin ng balangay na organisahin ang kanilang pamilya at ang buong komunidad para sa rebolusyon. Napipintong bubuun naman ang isang balangay ng KASAMA. Ang KASAMA ay organisasyon ng mga

manggagawa at mala-manggagawa sa maralitang komunidad sa lunsod.

Makasaysayan ang kumperensya para sa pagbubuo ng balangay ng MAKIBAKA sa Brgy. Alitaptap. Ito ang kauna-unahang balangay ng isang lihim na organisasyong masa na nabuo sa Kamaynilaan simula ng inilunsad ang Ikalawang Dakilang Kilusang Pagwawasto. Mabuhay ang kababaihan ng Brgy. Alitaptap! Mabuhay ang MAKIBAKA! 

## Sa ika-30 anibersaryo ng PDP, Photo eksibit nilahukan ng MAKIBAKA


**N**agdaos ng photo eksibit ang Pambansa Demokratikong Prente (PDP), kasama ang 15 kasaping organisasyon nito, sa pagdiriwang ng ika-30 anibersaryo ng pagkakatatag nito noong Abril 24, 2003.

Inilahad sa eksibit ang iba't ibang larangan ng gawain ng mga pulang mandirigma ng Bagong Hukbong Bayan (BHB), tulad ng edukasyon, pag-oorganisa, kultural, at militar. Ipinakilala rin sa pamamagitan ng malikhaing mga biswal ang oryentasyon at mga

tungkulin ng iba't ibang kasaping organisasyon ng PDP na nagbubuo ng mga lihim na bag-as ng rebolusyon sa kani-kanilang sektor na kinikilusan.

Lumahok rin sa naturang eksibit ang Makabayang Kilusan ng Bagong Kababaihan, na nagpakita ng

larawan ng isang babaeng mandirigma upang ipakita ang integral na papel ng kababaihan sa armadong pakikibaka para sa ganap na paglaya ng kababaihan at sambayanan.

Nilahukan ng humigit-kumulang 100 bisita ang nasabing photo eksibit na ginanap sa Bulwagang Claro M. Recto, Unibersidad ng Pilipinas sa Diliman. Sinundan ang pagbubukas ng eksibit ng isang talakayan kung saan nagsalita si Ka Roger Rosal ng BHB sa pamamagitan ng *phone patch*. 




## PAGGUNITA SA UNANG KONGRESO NG MAKIBAKA, *Kababaihan nagmartsa laban sa giyerang agresyon ng US*

**M**atagumpay na nailunsad ng mahigit sa 50 kasapi ng MAKIBAKA ang isang martsa sa kahabaan ng Recto at Morayta noong Marso 18, 2003 bilang paggunita sa unang Kongreso nito. Suot ang pulang maskara, nanawagan ang mga kasapi sa pagtigil ng giyera ng US sa Iraq at sa pagpapatalsik kay GMA sa pagkapangulo.

Ayon sa tagapagsalita ng MAKIBAKA, “Tayo ay nananawagan sa mga kababaihan na labanan ang interbensyong US sa mga bansa at kilusang anti-imperyalista. Kailangang higit nating paigtingin ang digmang bayan bilang sagot sa tumitinding atake ng reaksyunaryong guberno sa pambansa demokratikong kilusan at sa sambayanang Pilipino.”

Ang matagumpay na martsa ay pagpapakita lamang sa patuloy na

paglakas at paglawak ng pambansa demokratikong kilusan sa hanay ng kababaihan hindi lamang sa kanayunan kundi maging sa kalunsuran. Inaasahan ding magiging regular ang ganitong mga pagkilos ng MAKIBAKA upang ipakita ang lakas at kakayanan ng kababaihan at ang kahalagahan ng partisipasyon nito sa pagsusulong ng demokratikong rebolusyong bayan. Kung matatandaan, 1996 pa

nang huling maglunsad ng ganitong pagkilos ang MAKIBAKA sa Ilaya, Divisoria. 







# Pagpupugay kay Kasamang Marilou Fababier

**“Mabuhay ka, Ate Malou!”** Ito ang pahayag ng mga bata sa kanilang dating guro. Simpleng pahayag pero nakakabara ng lalamunan kapag binigkas para sa isang kasama na nag-alay ng buhay para sa rebolusyon.

Parang kailan lang, si Kasamang Malou ay buong pusong nagboluntaryo bilang “teacher aide” ng Parents Alternative Incorporated (PAI), habang nagsisilbi bilang tagapag-alaga ng isang bata. Tahimik, masipag at may matibay na paninindigan, si Malou ay naging taga-pagtaguyod ng karapatan at kagalingan ng mga bata at kababaihan.

Tubong San Narciso Zambales, panglima siya sa anim na mag-kakapatid na nagmula sa pamilya ng maralitang magsasaka. Kagaya ng karaniwang anak ng mga magsasaka, lumuwas siya sa Maynila at namasukan bilang katulong habang nag-aaral sa *high school*. Dahil sa dinaanang kahirapan sa buhay, naging madali para kay Malou ang pagyakap sa adhikain ng rebo-lusyonaryong kilusan. Taong 2000 nang maging kasapi siya ng MAKIBAKA. Sa halip na pumasal sa mga malls tuwing Linggo, si Malou ay nasa mga pag-aaral at aktibidad ng MAKIBAKA. Bunga ng kanyang


karanasan sa integrasyon sa Bagong Hukbong Bayan, nag-pasya siyang maging isang buong panahong pulang mandirigma para higit na mapaglingkurang ang sambayanan. Hunyo 2000 nang ihatid siya sa kanyang destinasyon, bitbit ang mga pabaon ng mga kasama para sa higit na pagsusulong ng gawain.

Ang pagsapi ni Ka Malou sa BHB ay nag-mulat sa kanyang pamilya sa tunay na dahilan ng kahirapang matagal na nilang dinaranas. Ikinararangal nila ang paglalaan ng panahon, lakas at buhay ni Malou upang palayain ang mga uring anak-pawis mula sa pang-aapi at pagsasamantala.

Mayo 27 nang matanggap ng mga kasama ang pina-kahuling sulat mula sa kanya. Kagaya ng naunang mga sulat, ito ay puno ng mga ku-wento at inspirasyon na nakakapagpataas ng moral ng mga

ka-samang kumikilos dito sa lunsod.

Isang buwan bago ang kanyang ika-24 na kaarawan, namatay sa isang engkwentro sa pagitan ng Bagong Hukbong Bayan at reaksyu-naryong militar noong Hunyo 24 sa Bataan si Malou. Sa gitna ng kalungkutan sa mga naiwanan niyang pa-milya at mga kasama’t kaibigan, matingkad ang paghanga sa kanyang pag-aalay ng buhay para sa re-bolusyon.

Ang pagkamatay ni Malou ay nag-iiwan ng hamon sa kababaihan at kabataan na higit pang isulong ng rebolusyon. Ayon sa kanyang huling sulat, “Ang lakas ng kabataan ay lakas ng pakikidigma para sa bayan. Agawin at konsolidahin ang ka-pangyarihang pampulitika. Taglay natin ang mapanlabang diwa!” 



Ang MALAYANG PILIPINA ay opisyal na babasahin ng MAKIBAKA na ililimbag apat na beses isang taon. Bukas po ang patnugutan sa ano mang komento o suhestiyong nais ninyong iparating. Maraming Salamat po.

# Pagbubuo ng balangay ng MAKIBAKA sa isang baryo sa Bikol

inilathala sa


**ANG Bayan**

 Pahayagan ng Partido Komunista ng Pilipinas  
 Pinapatrubayan ng Marxismo-Leninismo-Maoismo

 Taon XXXIV Bg. 12  
 Hulyo 21, 2003  
[www.philippinerevolution.org](http://www.philippinerevolution.org)

Sa isang prubinsya sa Bikol, ganap nang naitayo ang ilang samahang masa. Patunay ang mga ito ng tagumpay sa lahatang-panig na pagsulong ng rebolusyon sa prubinsya. Noong Hunyo, naging saksi ang isang kasama mula sa AB sa pagbubuo ng isang balangay ng Makabayang Kilusan ng Bagong Kababaihan (Makibaka) sa isang baryo sa prubinsya.

**D**ati nang nabuo ang MAKIBAKA sa baryong ito matapos mabuo ang Pambansang Katipunan ng mga Magbubukid (PKM) sa lugar noong nakaraang taon. Subalit nireorganisa ito nitong Hunyo dahil sa unang pagbubuo, hindi naisali sa kasapian ang kababaihang kasapi ng PKM. Muling nagdaos ng kumperensya ang kababaihan mula sa lahat ng sityo ng baryo upang muling buuin ang balangay ng MAKIBAKA.

Sa tulong ng BHB at Sangay ng Partido sa Lokalidad (SPL), naging madali ang paghahanda sa mga rekisito para sa pagbubuo ng MAKIBAKA. Noong Hunyo 15, inipon upang ayusin ang mga nakuhang talambuhay na may mga kulang o malabong datos. Kasabay nito, inihanda rin ang mga datos hinggil sa rebolusyonaryong kasaysayan ng baryo.

Kinabukasan, nagpulong ang mga kasamang nakatutok sa paghahanda ng mga rekisito. Pinaghati-hatian nila ang pagsasaayos ng borador ng isang taong programa ng MAKIBAKA, ng rebolusyonaryong kasaysayan ng baryo at ng mga talambuhay ng kasapian.

Nagpulong din ang ilang mga kasama mula sa hukbo at ang Komiteng Tagapagpaganap ng SPL (KT-SPL)

para tumulong sa paghahanda ng iba pang mga rekisito. Inihanda na rin ang mga teknikal na pangangailangan ng kumperensya katulad ng mga kagamitan at pagkain at ang paghahanap ng mga magaasikaso at magtitiyak sa kusina at seguridad.

Hunyo 18 ang kumperensya ng muling pagbubuo ng balangay ng MAKIBAKA. Sa 68 target na kababaihang kasapi, 42 ang nakadalo. Nagkataong nakasabay nito ang pulong ng mga magulang sa isang kalapit na paaralan, ngunit matapos mapaliwanagan ng mga kababaihan ang mga titser nito, iniatras ng paaralan ang nakaiskedyul na pagpupulong.

Sa kumperensya, binati ng masigabong palakpakan ang talumpati ng tagapangulo ng lokal na balangay ng PKM hinggil sa kahalagahan ng pagtatayo ng mga samahang masa at ang pagsisikap na hakbang-hakbang na maitaas ang antas ng pagkakaisa ng mamamayan sa baryo. Matapos ito, inilahad ng isang kumander ang kasaysayan ng baryo.

Upang magkakilanlan ang mga kasapi ng balangay, binasa ang kanilang mga talambuhay sa harap ng kumperensya.

Bandang hapon na nang tinalakay ang borador ng isang taong programa ng

balangay. Ibinukas ito sa mga komentaryo at mungkahi ng kasapian bago inaprubahan. Ilan lamang sa tampok na laman ng programa ang pagtatayo ng isang kwerpo ng mga instruktur, pagsapi sa grupong pandepensa ng baryo at paglulunsad ng mga proyektong pampinansya.

Matapos ito, inihalal ng kapulungan ang 16 sa pinakamahuhusay at aktibo sa samahan bilang kasapi ng Komiteng Balangay (KB). Mula sa 16, inihalal ang tagapangulo at mga pangalawang tagapangulo sa organisasyon; edukasyon; pinansya at ekonomya; kalusugan; at tanggulan.

Masigla ang bawat isa sa araw ng pagbubuo. Dama nila ang mahigpit na pagkakaisa ng kababaihan at ng hukbo. Sa pagtatapos ng maghapon ng kumperensya, itinanghal ang Awit ng Pag-asa na paboritong kantahin ng mga kasama sa mga kumperensya sa pagbubuo ng mga samahang masa.

“...Dahil mithi nati’y palayain,  
Bawat isa sa pagkaalipin,  
Sa gitna man ng gutom,  
kahirapa’t pasakit  
Hinding-hindi tayo susuko...”



# Lightning Rally ng PDPP, tagumpay!

**N**aglunsad ng isang lightning rally ang mahigit isandaang katao mula sa iba't ibang organisasyon sa ilalim ng Pambansa Demokratikong Prente ng Pilipinas (PDPP) sa pagdiriwang ng ika-tatlumpung anibersaryo nito noong Abril 23, 2003.

Mabilis at kalkuladong nagmartsa mula Recto hanggang Carriedo ang mga kasapi ng PDPP habang nagcha-*chant* at namamahagi ng mga polyeto sa mga taong kanilang nadaraan. Nagtapos ang rally sa isang maikling programa sa Raon.

Isa sa organisasyong nakilahok sa pagkilos ay ang MAKIBAKA na nanawagang "Isulong ang Rebolusyunaryong kilusan! Lumahok sa Digmang Bayan!"



## Mula sa Patnugutan:

**S**a kabi-kabilang krisis pang-ekonomiya, pampulitika at panlipunan na nararanasan ng kababaihan at mamamayan, hindi nakapagtataakang kasabay ring lumalawak at lumalalim ang saklaw ng ating rebolusyonaryong kilusan. Nahaharap tayo ngayon sa mas malalaking mga hamon na higit pang palawakin at konsolidahin ang ating rebolusyonaryong hanay.

Sa harap ng ganitong mabilis na pagsulong ng pambansa demokratikong kilusan, patuloy na tumatalima ang Makabayang Kilusan ng Bagong Kababaihan (MAKIBAKA) sa tungkulin nitong tipunin ang pinakamalaking bilang ng rebolusyonaryong kababaihang nakikibaka para sa tunay na paglaya ng kababaihan at ng sambayanang Pilipino.

Bahagi ng pagtalimang ito ng rebolusyonaryong kilusang kababaihan ang muling paglalabas ng *Malayang Pilipina*, ang opisyal na pahayagan ng MAKIBAKA. Layunin ng ating organisasyon na makatulong ang mga balita, artikulo, at mga likhang-sining na mababasa't makikita sa *Malayang Pilipina* sa lubos pang pagpapaunlad sa pampulitikang kamulatan ng mga kasapi ng MAKIBAKA, gayundin sa pag-abot sa mas malawak pang bilang ng kababaihang mapapalahok natin sa pambansa demokratikong rebolusyon.

Umaasa kaming sa bawat pagsuntok ng nakakuyom na kamao ng *Malayang Pilipina*, higit pang umalingawngaw sa bawat sulok ng bansa ang nagkakaisa't makabayang tinig ng rebolusyonaryong kababaihan.



# MGA REBOLUSYONARYONG KABABAIHAN

- M** – Teresa ng Iloilo  
Bilang rebolusnaryo'y kanyan nasabit, "Bakit hindi ba kaya ng babaeng lumaban nang singhusay ng lalaki"
- A** – Prinsesa ng Pangasinan  
Sariling pamayanan at hukbo'y pinamunuan, sabi niya'y "Ang king asawa ay dapat kasing tapang ko, kasing lakas at kasing talino."
- K** – Salud Algabe  
Saang rebolusyunaryong organisasyon kabilang and tumalos ng "Walang pag-aalsang bigo. Ang bawat isa ay may isa pang hakbang sa tamang direksyon?"
- I** – Manggagawang unyonista si Balandó, nabaril sa panahon ng Mayo Uno.
- B** – Liza na isa sa bumuo ng MAKIBAKA.  
"Ang babae ay hindi pangkama o pangkusina lamang!," and siyang sinigaw sa plaza Miranda. Di lumao'y tumungo sa kanayunan at humawak ng armas.
- A** – Ka Atang de la \_ \_ \_ \_ , Reyna ng Sarswela.  
Sa kanyang mga awit at arte'y Amerikanisasyon ay kinlaban.
- K** – Consolacion Chiva  
Waling Waling kung tawagin, sa Panay siya'y nanggaling.
- A** – Josefa Gabriela, Heneral ng Ilocos Kinalaban ang mga kinalaban ang mga kastila at itinatag ang Pamahalaan ng Ilocos".



Ang Patnugutan ng MAKIBAKA ay nagpapasalamat ng marami kina:

- Ka Ilia, Ka BP, Ka Felicity para sa mga artikulo
- BB para sa ilang magagandang litrato
- Ka Kamilo para sa paglalapat ng mga letra at mga litrato